

	<p>Objekt: Leni Jöpen   Et Jüppche un dr Jameboy</p> <p>Museum: Heimatmuseum Sindorf Digitales Museum 50170 Kerpen 0174 9434873 museum-sindorf@gmx.de</p> <p>Sammlung: Leni Jöpen   Sindorfer Mundart</p> <p>Inventarnummer: ST_50004</p>
--	---

## Beschreibung

Leni Jöpen | Et Jüppche un dr Jameboy

>>> Zum Starten der Tonaufnahme klicken Sie bitte auf das Foto oder auf "Abrufen des Objektes" unter dem Block "Zitieren".

Jüppche, dä kom heim vom Spelle  
un mot de Mamm flöck jetz verzälle.  
„Mama, Mama, weißte wat  
höck et Fränzje bei sich hatt?  
E Apperätche, klein un jrau!  
Un Mama, ich weiß janz genau,  
Jameboy heiß dat dolle Denge.  
Ich hör et noch em Ührche klenge.  
Mamm, könnt ich sujet och han?  
Ich hätt düchtich Spass dodran.“  
De Mamm meint: „Jüppche, haal de Schnüss!  
Du iwich met jet Neuem küss.  
Meng Wäschmaschin, dat weißte doch,  
die pief om allerletzte Loch.  
Ich han net suvill en de Täsche.  
Mem Jameboy kammer doch net wäsche.“

Bedröppelt schlech dat Jüppche fott,  
wor ävver senge Mamm net kott.  
„Wenn et bei de Mamm net klapp,  
versök ich et bei mengem Papp,“  
dach Jüppche sich un dät net wade,  
dä Papa dodrop anzeschwade.

„Papa, Papa, weißte wat  
höck dat Fränzje bei sich hatt?  
E Apperätche, klein un jrau!  
Un Papa, ich weiß janz genau,  
Jameboy heiß dat dolle Denge.  
Ich hür et noch em Ührche klenge.“  
Dä Papp meint: „Juppemann, hür op.  
Schlag dr dat Denge us em Kopp!  
Du weiß genau, ich ben am spare.  
Ich möch op Käjeltour jän fahre.“

Bedröppelt schlech dat Jüppche fott,  
wor ävver sengem Papp net kott.  
Er dät am Köppche sich ens jöcke  
un meint: „Beim Pitter weed et jlöcke.  
Ich moss dä Jameboy einfach han!“  
Nu häüt hä senge Broder an:  
„Pitter, Pitter, weeßte wat  
höck dat Fränzje bei sich hatt?  
E Apperätche, klein un jrau!  
Un Pitter, ich weiß janz genau,  
ich dät bluß jot noch von dir denke,  
wenn du mir könntst jet Mūs usklenke.“  
Pitter schöddelt senge Kopp  
un meint: „Du klitzekleine Stropp,  
ich ben et satt, ze Foß ze loofe,  
ich well mer doch e Mofa koofe.“

Bedröppelt schlech dat Jüppche fott,  
wor övverhaup kei bitzje kott.  
„Ich jon jetz zo Marizebell,  
dat deit jo allt ens, wat ich well,  
dach Jüppche, leef zo senger Schwester.  
„Schatzilein, hier kommt dein Bester,  
sät dat Bröderche jewitz  
un bütz nu och noch et Mariz,  
„Jöngelche, wie küsste mir,  
du häs doch janz bestemmp jet vör?  
Wenn de von mir wells Nüsele han,  
ich övverhaup net helpe kann.  
Ich fahre op en Schönheitsfarm,  
don jet för Schönheit un för Scharm,  
Marizebell zom Jüppche sät.  
Dat Bröderche en Fleeche nu mät.

Hä denk bedröv su vör sich hin:  
„Wat moss dat Minsch esu knistich sen?  
Un dann dat Bjutiefarmjeschnatter!  
Ich froge menge Jroßvatter.“  
De Opa setz om Stohl un schlief,  
hält lenks en senger Schnüss de Pief.  
„Opa, Opa, werd ens wach!  
Ich han en üßerst wichtije Saach.  
Könnste mir e Schengche borje?  
Ich dät mr jän jetz Neus besorje.  
Ich leit dich och ens domet spelle.  
Don mer doch dä Wunsch erfülle!  
Ne Jameboy dät ich mir jän holle,  
bluß fähle mir dozo de Kolle.“  
Jroßvatter brummp: „Du weest genau -  
jede Jrosche für Schabau!“

Bei de Jroß, dem beste Stöck,  
versök dat Jüppche nu sie Jlöck.  
„Oma, Oma, hör mich an,  
ich möch jän ene Jameboy han.  
Luur en et Pottemanee ens flöck,  
op do noch ene Hunni steck!  
Meng allerbeste, leevste Jroß,  
jev v dengem Hätzje ene Stoß!“  
dat Jüppche beddelt nett un leev,  
de Oma ävver meint bedröv:  
„Jüppche, menge Stroppemann,  
ich övverhaup net helpe kann.  
Ich spare doch, dat es jewess  
allt Woche för et neu Jebess.  
Die ahle Zäng sen ärch verschlesse,  
ich kann domet doch nix mih esse.“

Och wenn mer et net richtig jläuv,  
dat Jüppche wor nu doch bedröv.  
Kei Minsch wollt em dä Jameboy koofe.  
De Troone finge an ze loofe.  
Janz jottserbärmlich hä nu schleck,  
doch die Hölp, die es net weck.  
Dä Lumpi, dä kütt anjeras  
un stups en met de föchte Nas.  
„Wuff, wuff, luur, wat mer es jelunge.  
Em Kleiderschaaf han ich dat funge“.  
Hä deut e Päckelche em hin.

„Wuff, wuff, do es ene Jameboy dren!  
Mie feng Näsje konnt et ruche,  
ich jläuv, dat kannste jot jebruche.“  
Et Jüppche senge Lumpi dröck,  
als wör hä wöhrlich knatschverrück.

Do kütt de Mama en de Stuff.  
Se sieht, wat loss es, jrief nohm Schluff  
un bröllt wöödich: „Leeven Jott,  
die Övverraschung es kapott!“  
De Mama sät zom Jüppche dann:  
„Du solls jo sune Jameboy han.  
Jebotsdach häste en zwei Woche.  
Dem Lumpi breche ich de Knoche!“ -  
„Mamm,“ röf Jüppche, „don et net,  
he, nemm dä Jameboy wedder met.  
Ich han en bis nächste Woch verjesse.  
Dä Lumpi kritt se net jeresse.“  
Lumpi krüff us sengem Höttche,  
waggelt fruh met Stätz un Föttche.  
De Mamm, die moss nu hätzlich laache  
un meint: „Dann kann ich wahl nix maache.“

## Grunddaten

Material/Technik:

Mp3-Datei

Maße:

## Ereignisse

Aufgenommen	wann	2019
	wer	Leni Jöpen (1940-)
	wo	Kerpen

## Schlagworte

- Jüppche
- Leni Jöpen
- Mundart
- Sindorfer Mundart